

**Inissiisarfinni parnaarussanut nakuusernermik atuisarneq pillugu nalunaarut****(nakuusernermik atuisarnermik nalunaarut)**

Kalaallit Nunaanni pinerluttulerinermi inatsimmi § 222, imm. 5 naapertorlugu, tak. inatsit nr. 306, 30. april 2008-meersoq, aalajangersarneqarpoq:

§ 1. Paaqqinniffik parnaarussanut nakuusernermik atuisinnaavoq malittarisassat pinerluttulerinermi inatsisip § 222-aniittut malillugit.

*Imm. 2.* Taamaattoq nakuusernermik atuineq tigusinikkut anaatalersornikkullu taamaallaat pisinnaavoq.

§ 2. Tigusineq anaatalersornerlu pissaaq Pinerluuteqarsimasunik Isumaginnittoqarfiup pisortaata najoqqutassiai naapertorlugit.

§ 3. Taamaallaat anaatalisartoqarsinnaavoq pissutsinik immikkut aarlerinaatilinnik atuuttoqavippat, anaatamik atuinissamik pisariaqalersitsisinnaasunik. Anaatamik taamaallaat tunniussisoqarsinnaavoq paaqqinniffiup aqutsisua imaluunniit inuk, taamaaliornissamut piginnaatitaasoq, akuersisillugu.

§ 4. Taamaallaat talitigut, nissutigut, tunukkut imaluunniit nulutigut anaasisoqarsinnaavoq.

*Imm. 2.* Anaaneqassanngilaq niaqoq, qungaseq, pukusuk, qutuk, sakissat, nassat, tartut, nalikkaat imaluunniit qiteralik.

*Imm. 3.* Anaataq aportitsinermut atorneqassanngilaq.

*Imm. 4.* Anaataq seeqqunut, ikusinnut naggussanulluunniit allanut sapinngisamik anaasissutiginaveersarneqassaaq.

§ 5. Paaqqinniffik parnaarussamut nakuusernermik atuisimappat nalunaarusiortoqassaaq sapinngisaminik piaartumik, nakuusernermik atuineq pillugu nalunaarusiornermi immersugassaq immikkut ittoq atorlugu.

*Imm. 2.* Parnaarussaq noqqaassuteqarnikkut nalunaarusiap nuutsinneqarneranik tunineqassaaq, taamaattoq tak. imm. 3.

*Imm. 3.* Allagaatinik takunnissinnaatitaaneq ingerlatsinermut inatsisit naapertorlugit killilerneqarsinnaavoq, matumunnga ilanngullugu parnaarussap imminut pitsaanusussaq isumaginarlugu nalunaarusiamik atuisinnaaneranik soqutigisaqarnermiit pingaernerutinneqartariaqarpat pineqartumik namminermik imaluunniit inuinnarnik allanik imaluunniit pisortat soqutigisaannik, soorlu paaqqinniffiup isumannaatsuunissaanik, imaluunniit inuit ataasiakkaat illersorneqarnissaannik, qajassuussineq.

§ 6. Nakuusernermik atuinissaq pillugu aalajangiissaaq paaqqinniffiup aqutsisua imaluunniit inuk, taamaaliornissamut piginnaatitaasoq.

*Imm. 2.* Inuup imm. 1 malillugu piginnaatitaasup aalajangiinissaa pisuni ataasiakkaani utaqqineqarsinnaanngippat, sulisoq alla aalajangiissaaq. Taamaattoqartillugu inuk imm. 1 malillugu piginnaatitaasoq pisimasoq pillugu sapinngisamik piaartumik nalunaarfigineqassaaq.

§ 7. Nalunaarut atuutilersinneqarpoq ulloq 1. januar 2010.

*Kalaallit Nunaanni Pinerluuteqarsimasunik Isumaginnittoqarfik, ulloq 7. december 2009*

Thomas Nicolajsen